



14403

III

Mss. St. D. T.

P


*Adam Ignatius**cracoviensis*

*Cracoviensis Coll. S. Pat. Manuscriptarum
in solenni inauguratione.*

PANEG. et VITAE

Polon. Fol.

№ 446



S

A
fr

A
P



MAJESTAS SACRORUM

In Solenni Inauguratione.

Celsissimi, Illustrissimi & Reverendissimi

PRINCIPIS ac DOMINI,

D. ADAMI IGNATII

COMITIS à LIPTOW & ORAWA

KOMOROWSKI,

Archiepiscopi Metropolitani Gne-
sensis, Legati Nati, Regni Poloniae
& Magni Ducatus Lithvaniae

PRIMATIS. 14403 75


Primique Principis

ABBATIS perpetui Tynecensis, & Andre-
jovienfis COADIUTORIS

Panegyrico cultu Nomine *Scholarum Piarum*
à Collegio Cracoviensi

ADORATA.

Annô Domini M. DCC. XL. IX. *Die* *Mensis*



C R A C O V I Æ.

Typis ROSALIÆ Viduæ Siarkowska. p.

In Avitum Domûs
Insigne KORCZAK.



FLVMIN A per Rivos ubi Ter volvuntur Avitos
Æmula Castalijs Phæbe Tuisque vadis :
Convenère simul, confederuntque Sororas
Quævis & ex genio ferta ferebat Aquis.
Florea Euterpa dabat, sunt hæc aptissima dicens
FONTIBVS his Patria victima multa venit:
Calliopa ast Oleam, Laurum sed Clio parabat
Hæc Titulos Martis, Pacis at illa decus.
Denique Cœlestis necebat Vrania Stellas :
Astra quot hinc Aris enituère Sacris
Rem dirimit panditque adytis Curtina reclusis
Fluminibus PRIMAS Ipse Corona Suis.

DEDICATORIA
CELSISSIME
PRIMAS
PRINCEPS
CLEMENTISSIME.



*Q*uemadmodum maxima rerum est Virtus, ita nihil est quod ad illius præstantiam, sublimitatemque propius accedere debeat, quàm laus virtutis, & par Oratio recte gestis. Ex hoc facile quilibet angustias nostras intelliget, qui Literarum audaciâ Majestatem illam Laudum TVARVM adire præsumimus, cum nec Styli, nec ingenij nobis insit tanta facultas, aut dignitas, quam ad præconiorum TVORVM ministerium condignè admovere valeamus, meritorumque immortalitati, pro
A2 ampli-

amplitudine & magnificentiâ eorum con-
secrare. TV A enim recte gesta quoties
eorum Laudatio suscipitur, & de actu
in Verba transeunt Oratorum, pluri-
mum Splendoris, ac speciei Suae deper-
dunt; Nullius quippe est tanta vis uber-
tasque eloquij, quæ Vniversas Laudes
TV AS consequi possit, vel complecti.
Itaque hujus tenuitatis Nostræ conscij,
inseremus sacris gloriæ TV Æ pulvina-
ribus non divitis opulentiam suadæ, sed
è paupere Musarum Nostrarum supelle-
ctili, grande Amoris, & obsequij pignus,
Dignitate argumenti, TE IPSO scilicet
nobilitatum; freti Animi TV I magni-
tudine solâ, Amplissimoque clementiæ si-
nu; quo in morem Oceani tam ingentia
flumina, quam & minores rivulorum
aquas admittere non dedignaberis

Celsitudinis TV Æ Primatialis

Humillimi Clientes

Devotissimi Exoratores

Collegij Cracoviensis

Clerici Regulares Scholarum Biarum

PANEGYRICUS.



Ge feliciter **CELSISSIME PRIN-**
CEPS annum ineuntem, Patriæ
TIBIQUE auspiciatissimum, So-
lennibus Pontificatûs **TUI** per
Universam Poloniam Magnumquè
Ducatum, Lithvaniæ Primitijs,
Consecratum. Inscere Sacratum,

verticem Archi-Præfuleæ Mitræ, in cujus Coronamen-
tum tot laboraverunt Annorum Lustra, donec parem,
ad mensuram meritorum offerrent Coronam. Occupa
PRIMATIALE Primus à Rege Solium, illaque
Majestate spectabilis vacantem **VICE-REGIAM** imple
Sedem, quâ Rex Sacrorum Orbi Sarmatico præfideas,
Omnium quâ latepater Polonia Ecclesiarum Sollicitu-
dinem gesturus. Renascere fausto omine Amplissimo
munere Sedis Apostolicæ **LEGATUS NATUS**,
illamque in Regno Poloniæ & Magno Ducatu Lithva-
niæ Primi summique Principatûs arcem obtine, qua
publico avitoque Gentis totius more, **PRIMAS PRI-**
MUSQUE PRINCEPS celebraris. Indue Sacros
illo Purpuræ Honore lacertos, quam **PRIMA-**
TIALI TUÆ in Republica Dignitati Eminentissimæ
ac meritis, Sacra Regia **AUGUSTI III.** efflagita-
vit *MAJESTAS*, *Vaticana* ultrô decrevit Potestas.

Et ut inde Ordinem sumat Oratio, unde Principa-
tûs suscepti primordia auspiciatò Nactus es; *Serenissi-*
mo ac *Potentissimo* Poloniarum Regi **AUGUSTO III.**
Gratiæ immortales diuturnumq; sit Imperium, ac foelix,
quod quàm primùm post Sanctissimi Senis Prædeces-
soris **TUI** decessum, *Sedes hæc Gnesnensis Suprema,*

B

nec

nec non reliquarum in Regno Sedium Antesignana vacavit, orbitatem illius solari non distulit, Sacratissimo Nominationis Suae oraculo ad TE converso. Plus ne gloriae TIBI inde accesserit, an gratiae singularis? non facile pronuntiaverim. Ad gratiam certè spectat, quod repetitis jam antehac vicibus Pontificios TIBI AUGUSTUS adscripserit Honores: sed abnuente modestiâ TUA, meruerunt tunc Virtutes TUÆ, ut recusatarum Infularum laude insignirentur. Ad gloriam verò pertinet singularem, quod cum essent pluri-
mi, qui moderationem illam damnabant TUAM, quâ conspirantibus cum voluntate PRINCIPIS Ecclesiae votis, Optimum Optatissimumque PRÆSULEM Cathedris recusabas; obfuturum id ulteriori apud PRINCIPEM gratiae suspicabantur, aliter secutus docuit eventus. Infularum enim deprecatione id consecutus es, ut dignior iudicio PRINCIPIS habereris. Incaluit tergiversatione illâ modestiæ TUÆ Bonitas PRINCIPIS non refrixit, dilata tunc fuit prona in TE Majestatis voluntas, non ablata. Ac si ita reputaret intra semetipsum Optimus PRINCEPS: *Quam exigua est infra merita Huic est votorum mensura! praestolari post Omnes, quod praeter reliquis meruisset; imo Unus hic est qui mereri contentus ultra praestolatur nihil, quin est sponte occurrentibus premiis renuntiat. Hac agendi ratio muneraque deprecandi stylus si apud Aulam porro invalescet, ad novum est insolitum Aures Regias consuescere oportebit tenorem: quæ hætenus importunis diversa precantium postulantiumque precibus non nisi fatigari didicerunt. Sed enim donetur Ille hæc vice modestiæ Suae, brevi mea restituendus aequitati. Tale AUGUSTI de TE iudicium non ego ad Gloriam TUAM solummodo, sed ad ipsam Famæ TUÆ immortalitatem spectare arbitror. AUGUSTI inquam III. Quem Principem rebus Nostris Divinitus contigisse credimus, Imperij sui est*
longa

longa Populorum vota exaquantem, Jussum, Inconcussum,
 Munificum, Viriutique per omnia Simillimum. Quo Re-
 gnante revocata in forum integritas, restituta Legibus
 reverentia, omnibus aequitatis, industrie, laudis amor in-
 cussus, aut imperata necessitas Probitatis. Sub cujus Sce-
 ptero vivere libet, natum esse non poenitet. Cujus Augu-
 stam Mentem, & numerosâ Gloriâ Excelsam Animum
 externa etiam Ornamenta commendant. Proceritas Cor-
 poris, & Dignitas speciei summa, robur virium intactum,
 & Temperantiâ Custode duraturum, Vultus illa Ma-
 jestas, qualem artis suæ studio Colorum periti Numinibus
 affingunt. Et quod Omnibus Natura & sortis muneri-
 bus præstat, Huic Sacro Fœdere connubij Sociata AUGU-
 STISSIMA MARIA JOSEPHA Austriacarum Dea-
 rum Sacerrima, cujus Gentis Numen Toti formidatum
 Europæ, Polonia Sceptris & venerationi cœlitus redditum,
 restitutâ in se Austriacarum Reginarum à seculis retro-
 actis Majestate, ultrâ mortalis cultûs Obsequia reveren-
 tiam sibi Sanctitate Conciliat. Talis tamque AUGU-
 STUS est PRINCEPS, qui ad TE magis Judi-
 cium quam favorem suum convertit, Dignissimum-
 que censuit qui Regum vices Unus impleres. Tardiùs
 quidem comparatione aliorum, quos ad Infulas præire
 TIBI sivisti, sed cumulatiùs. Hæc sola modestia TUA,
 nisi obstitisset, pridem jam voto suo sanctioresi Mitræ
 potitæ fuissent, quod hodie demùm obtinuere, ut Sa-
 cratissimo Vertici TUO infideant. Vive diu PRIN-
 CEPS! TVASQUE, ad fastigia Infularum moras, diu-
 turna expiet felicitas. Merebantur virtutes TUÆ, ut
 cœlestibus indicijs Pontifex declarareris, sed visum
 magis est cœlo, TE AUGUSTI III. Oraculo desi-
 gnari. Cujus Numini Suprema Mens illa TE in hanc
 ætatem reservavit. Et verò Ecclesiæ PRINCIPES, non
 humanis affectibus, sed Divino consilio Suffragioque
 constitui, quando clarioribus certioribusque indicijs

comprobatum fuit? quàm in Tuâ hâc **CELISSIME PRIMAS** Assumptione. Si hominum affectibus & non Cœlesti Mentis Suæ Judicio obsequi maluisset **AUGUSTUS**; **TE** nondum haberemus. Sed Is qui Cor Regis in manu Suâ versat, Ipse edocuit quem sibi Pontificem ex hominibus assumpisset. Calamitoso id quidem admodum evenit tempore, quò iram suam offensum Terrigenis per multiplicia mala declarat cœlum, sed sic ad Mediolanensem *Carolus Borromæus*, sic ad Petri Sedem *Clementes & Innocentij* calamitate publicâ Populos urgente, Reconciliatores accesserunt. Non obscurâ Cælestis declaratione sententiæ, perituum id omne, quod tuendum non suscepisses, cunctaquæ calamitatibus fessa **TIBI** committi, felicitati meliorique Fortunæ **TUIS** restituenda auspicijs.

Sed patere **PRINCEPS CELISSIME** Curiosam diligentiam ad ipsa incunabula ejus quâ hodie præfulges Majestatis convertere, & imprimis Sacros **KOMOROVIAE** Gentis **TUÆ** introspicere fastos, & Verustissimæ Nobilitatis Atria collustrare, unde se ista **TUA** evoluit Celsitudo: deinde teneræ, mox & adultæ Indolis **TUÆ** gloriosissima emetiri spacia, in quibus maturâ luce præsentis Principatui **TUO** virtus prolusit. Id jam aggredi præsumo, certè, non ingenij, non eloquij fretus potentiâ, quod tenue & aridum est: sed rerum dicendarum subnixus veritate, quæ comi adscititijs ornamentis recusat, tunc maximè placens dum incompra, & venerabilior quando nuda. Proferam Simulacra, & innumeras Avorum Imagines in conspectu statuam, quibus nescio quæ Clarissimæ Domûs porticus superbirent. Repetitis ab ultimâ Majorum stirpe pulcherrimarum rerum exemplis, aperiam artes, studia, instinctus, quibus Ingentes animæ velut traditâ mutuò per successiones gloriâ, & versâ in naturam ardua, quæque & excelsa tentandi ac adimplendi consuetudine,

dine, ævum suum posteritatemq; totam illustrârunt. Multa hic in Togâ Religioso pacis Otio enutrita Sapientię studijs adoleverunt Ingenia, sed & infinita propemodum in sago Heroum agmina fortiter gestorum, proventu clarissima, in TUAM PRINCEPS laboraverunt famam, qui per innumera provocatę fortitudinis experimenta *Scavolas, Scipiones, Rutulosque* Italię, vel *Achilles, Leonidas, & Hęctores* Gręcię, redivivos in se Patrię præstiterunt. Horum jam seriem ex Annalium fide in paginas referemus.

Aliena omittam, nimirum quot Nomina clarissimęq; Familię, sub gentilitio *Korczak* Armorum Vestrorum præsidio per Apuliam, Calabriam, Neapolim in CARAFIS, apud Rempublicam Venetam in DONATIS, Serenitate. Ducum, Sanctitate summorum Pontificum inclaruere. Non recensebo in hoc ipso Regno per diversas Provincias & Palatinatus Vestris Insignitas armis, *Chodorowsciorum, Zorawinsciorum, Derpsniakorum, Boratynsciorum, Branicciorum* longa famę, Titulorumq; serie in *Russia, Podolia, Volhynia* Domus celeberrimas; Non memorabo in ipso Orthodoxę Fidei in Lithvania illucescentis diluculo, quot Profapię antiquissimę, simul ad Religionis Lumen, ac Stemmatibus Vestri Splendorem oculos, animumq; converterunt, & ad Gentis KOMOROVIANÆ accesserunt Clenodia. Simul Sacrum Baptismi Fontem cum Vestris suscipientes *Fluminibus* in Tesseram gentilitiam Orthodoxę Nobilitatis, agente id VLADISLAO JAGELLONE PRIMO, ut simul CHRISTO, simul Regno adjunctâ unitâque *Lithvaniâ* suâ, æterni hujus, Sacerrimique nexûs Arrham, quasi acciperent Lithvanicę Familię, in Variarum Polonię Familiarum, Vestręq; KOMOROVIANÆ Domûs Stemma transeundo. Decora hæc fere innumera in alias Familias, à Vobis derivata, à longè venerabor. Ea duntaxat quę Vos proximius spectant, propria, domestica, intima, & genuina

nuina KOMOROVIANI Nominis Vestra Specimina
prosecuturus. Ea inquam Specimina Laudum & Glo-
riæ, quæ apud Vos Domi propriæ & in sinu Vestro
nata, non aliunde quæsitæ copiosissimè abundant.

Annus supra millesimum, trecentesimus septuagesimi-
mus agebatur, cum alto de Sangvine per Hungariæ
Regna deductum Genus Nomenque KOMORO-
VIUM, Domûs Vestræ Protoparens in Regno DE-
METRIUS KOMOROWSKI Comes in *Liptow*
& *Oravâ* Dynastiarum & Arcium *Rozemberga Zabine-*
cia, Hradecia, Stargardia Sanicotana, in Hungariæ
Regni confinijs Hæres, in Poloniam invexit, fortunam-
que Suam cum Nomine in hoc Regnum intulit. More
Solis statim à primo his in partibus Ortus clarissimâ
luce genus suum resplenduit, dum primis effulsit Senatûs
Honoribus. Ingenti quippe ære apud *Radultos* amplif-
simo *Comitatu Zyvecensi* cum arcibus *Bervald & Szaffla-*
ry comparato in *Ducatu Zatorienfi*; SUPREMUS RE-
GNI THESAURARIUS à LUDOVICO Rege tunc
Regnante renunciatus fuit. Sit sanè aliorum Fluminum
hæc Conditiō, quod per Varios populos transeundo, &
terras, non alveum solum, sed & nomen & saporem
mutant, sibi ipsis per omnia dissimiles. *Flumina KO-*
MOROVIORUM gentilitia, Nativum quem ex Hun-
gariæ Regno traxerunt, ubique pari pretio efformant
alveum, custodiuntque perenniter. Aureum in DE-
METRIO Virum tunc nacta Polonia, non alibi quam
in Thesauri publici Scrinio reposuit, Supremâ Thesau-
ri Regni Insignitum Præfecturâ. Accessit æstimationi
Viri, amor LUDOVICI Regis, ne etiam hic à The-
sauro Cor sejungeretur. Itaque Regno & Vitâ Cessu-
rus LUDOVICUS, pretiosissimum supra omnes
gazas quod habebat Cymelium, HEDVIGEM Fi-
liam in Spem Regni susceptam, Poloniæ Reginarum
Sanctissimam, tunc quidem Minorenem, inque Matris

ELISA-

ELISABETHÆ tutelâ relictâ, Proceribus Poloniæ,
& hos inter DEMETRIO singulariùs commendat;
quæ Sponso quemcumque ei Respublica elegisset cum
pulcherrimis dotibus Regnum etiam esset allatura. A
Funere LUDOVICI deductæ Cracoviam *Diva Principi*
HEDVIGI paretur, Regijsque sumptibus providetur
Supremi Hujus Thesaurarij Ministerio. Interea à di-
versis Principibus expetita HEDVIGIS, JAGELLO-
NEM quoq; *Magnum Ducem Lithvaniae* in Vota tra-
xit. Hæsit Regiæ PRINCIPIS mens non suspensa so-
lùm, sed planè renitens diversitate Sacrorum, Gentili-
tas quippe apud se JAGELLONI obstabat, jamque
aliò vel sponte suâ, vel diversorum consilij inclinata
videbatur; sed feliciter Paranympum Agente DEME-
TRIO; JAGELLO cum tota Familia Ducali, Genteque
Lithvanâ CHRISTI Religionem; HEDVIGIS in
Thori *Thronique* Poloniæ Societatem, recipit JAGEL-
LONEM. Pompâ, impensis, splendoreque summo,
qualis Monarcharum fœdera Sancta decet, Nuptialia Sa-
cra coluntur, Neq; tunc duo illa Neosponsorum Regum
Corda, sed duo Maximi Populi Poloni nempe, ac Li-
thvani, in Unum indissolubili vinculo Corpus feliciter
coaluere. In hoc per Omnem sæculorum seriem au-
spicatisimo Reipublicæ eventu, DEMETRIO KO-
MOROVIO cum alijs Regni Proceribus ad Immor-
tale Familiæ Suæ decus principales Ministerij sui obeunte
partes. Ut vero illud quoque Sapientis adimpleret effa-
tum, *Neminem sibi nasci*, sed ortûs sui partem unam Pa-
triæ, alteram Amicis unumquemque debere: ne in aliquo
Generis sui claritudini perpetuæ deesset, Tres veriores
Gratias, Filias nempe, quas ex Illustrissima Consorte Sua
Beata Armorum eorundem *Korczak* sustulerat; Summis
Maximisque tunc in Regno Proceribus; *Elisabetham*
Dobrogoŝto Castellano Posnaniensi, Generali Majoris Po-
loniæ, Annam *Tęczynio* Cracoviensi, Catharinam Ole-

Inicio Sendomiriensi Palatinis elocatus ut primas Regni Familias necessitudinibus devinciret, Splendoremque earum in Posteritate faceret perennem, ex tali conjunctione. Enimvero quemadmodum ut Dijs sati nascantur Hæroes, Matrum delectus habetur, nec Alcidem nisi Alcmena parit, ita *Tęczyński Oleśnicki*, vetustissimarum Prosapiarum Hætores ex KOMOROVIORUM illustri sanguine debuerant propagari. Profecto *Tęczyński* ex *Anna Komorovia* Filia *Kaniecpolsium*, illum edidit, Cujus gloria per ævum memoresque fastos celebratur, in Supremo Cancellariatûs Regni Ministerio, ex *Catbarinâ* vero cum *Oleśnicio* duodecim prodire Filij, Omnes Senatorijs conspicui curulibus, quos inter SBIGNEUS Cardinalis *Oleśnicus*, primò Referendarius Regni, deinde Cracoviensis Antistes, Ducatum Severiæ ære suo emptum Cracoviensi adjecit Cathedræ, postremò Archiepiscopus Gnesnensis ad Primatiam Majestatem TIBI Abnepoti Suo Viam præformavit. Ternioni Sororum duo Fratres ceu duo Fulmina belli accedunt DEMETRIJ Filij: quorum alter, JACOBUS dum fortia contra inquietum motûsq; cientem Svidrigellum exequitur, pulcherrimam mortem oppetijt à Tartaris occisus in bello.

NICOLAUS verò alter Filius DEMETRIJ, Comes in *Zywiec*, *Liptow* & *Orava* VLADISLAI *Jagellonidis* partes virtute & indole Martiali fortiter in ad-eundo Regno Hungariæ tutando, adversæ factionis Ducem cui ab *Iskra* popolare nomen, multis velitationibus variè afflixit. Scepusiensem Poloniæ tractum, contra ejusdem molimina multiplicesque aggressiones, invicto robore defendit, Poloniæ hoc ab Hungaria propugnaculum salvum & integrum servavit, *Supremus Scepusiensis Præfectus*, in illâ infelici scintillâ ignem feliciter extinxit, qui correpto Scepusio per intima Regni facile majori pervagatus fuisset incendio.

Pressit

Pressi t Heroica Patris vestigia PETRUS *Nicolai*
Filius Comes in *Zywiec, Orava & Liptow*. Huic Fidei
erga Regem, fortitudinis in hostes exercendæ Campum
Amplissimum aperuit Annus 1470. Annus inquam sæ-
cularis, à quo KOMOROVII in Polonia fixerant Sedem.
CASIMIRUS hujus Nominis IV. JAGIELLONIDES,
VLADISLAI Poloniæ & Hungariæ Regis, qui fata cla-
de Varnensi, notavit in Anno 1444. Frater, Hic ex ELISA-
BETHA ALBERTI *Austriaci Cæsaris* Filia, LADISLAI
Hungariæ Regis sorore, quam in Anno 1454. duxerat,
præter alios postea natos, duos jam Scepbris tenendis pa-
res Filios numerabat; VLADISLAUM videlicet & CA-
SIMIRUM, quem postea inter Sanctos Sacrà relatum,
Apotheosi, Ecclesia Christi veneratur. Utrique Princi-
pi, Libero Populorum Suffragio Regna se se aperue-
re amplissima: *Bohemia Vladislao*, Hungaria *Casimiro*
Sancto post sterilia Ladislai fata tanquam Sororino.
Sed *Bohemia* facilius *Vladislao* obtigit. Hungaria inte-
stino Bello, Civilibusque scissa discordijs *Mathiâ Hunia-*
dis Filio quâ vi, quâ dolo cuncta miscente. Jamque
eo miseram Gentem deduxerat *Mathias*, ut Oppresso-
rem exosi cuncti ad Legitima JAGIELONICÆ Domûs
sceptra respicerent, suspirarentq;. Instruitur Solemnis
amplissimaque ad CASIMIRUM Regem Legatio,
in cujus Capite erat *Joannes* Archiepiscopus Strigonien-
sis Hungariæ Primas, & *Paczynius* Quinqueecclesiensis
Episcopus, Oratores. Precantur *Casimirum* florentissi-
mi pulcherrimique Hungariæ Regni compatiatur vici-
bus, Usurpatorem Tyrannumque *Mathiam*, Cervicibus
populi sub jugo gementis amoveat, CASIMIRUM
Principem secundò genitum Hungariæ Solio donet, quò
Ei & Maternus Cæsaris Alberti sanguis iter præmon-
strat, & Gentis totius invitant Vota. Se publico Omni-
um Nomine Obedientiam, fidemq; polliceri. Assenti-
tur justis precibus CASIMIRUS Parens, Sanctissi-
D mumq;

munusq; Principem Hungaris supplicantibus concedit. Adornatur contra *Matthiam* expeditio. Duodecim milia exercitus cum Principe CASIMIRO mittuntur, Ductoribus Copiarum *Petro Duninio* Succamerario Sandomiriensi, & PETRO *Komorovio* Comite summæ Præfectis rei. Sed quanta est hominum sive naturæ, sive Cœli sub quo degunt impulsu levitas, in momento *Matthia* artibus circumventi, studia in contraria vertuntur Hungari, & quem propediem (*Dlugossio* referente) velut pestem quandam Notoriumq; Tyrannum execrabantur, ejusdem reconciliantur partibus, mutatâque adhærent fide Ei, quem ejuraverant. Reginus interea Princeps CASIMIRUS ad *Nitriæ Portas* Annibal sanctior, Sux Suorumq; Polonorum Opi propriæ relinquitur, & nec salutatus, quidem, turpiter deseritur. Succurrit Dignitati delusi Principis KOMOROVIVS PETRUS & in tam inopinato casu, fortunæ telis omnibus semper consilio Major, relicto apud Nitriam cum *Jasinscio*, qui ex *Bohemia* advenerat, ac *Duninio* reliquo exercitu, Principem à perfidis delusum, Procuresque Regni, qui honoris causâ Regio Principi CASIMIRO Comites additi fuerant, cum parte Copiarum ad Confinia Regni deductum, in Comitatum *Liptow* & *Orava*, nec non in Arces suas Avitas recipit, amplissimarum ditionum Suarum Castra CASIMIRO patere, parereque jubet, imo sumptu proprio per menses quindecim Regiæ necessitati cum Aulâ tota Obsequitur, splendideque de Omnibus providet, donec inter *Matthiam* & CASIMIRUM Parentem, nec non Electum Principem in Anno 1473. fœderibus sancitis res Composita; CASIMIRO Sanctissimo Principe brevi post hac è vivis abeunte, *Matthias* in KOMOROVIVM quam diu coxerat rabiem virulentam effulusus, totâ vi Potentiâque in Jllum convertitur, Avitis castris *Rozembergâ Hradecz, Sobieniecz, Starograd* & *Sannicalao* ejicit, ac spoliat, Comitatu quoq;

Liptow

Liptow & Orava modico pretio ut obtentum aliquem Tyranidi Suæ prætexeret per vim obtruso exuit: Ita PETRUS opulentis pulcherrimisque Possessionibus in Hungaria, in quibus CASIMIRUM Principem receptaverat, sibi per vim ac furorem *Mathia* ereptis, ad Comitatum *Zyvecensem*, qui Unus sibi in Polonia supererat, regreditur. Et quidem violentiæ tunc subductus est Tyranni, sed non dolis. Nec dum enim vindictæ suæ satis datum esse existimans *Mathias*, Ultionis virus dum aperta vi prosequi non valet, in absentem, fraude artibusq; occultis sævire perrexit, & PETRUM quem spoliaverat fortunis, etiam Regis CASIMIRI gratiâ dejicere molitur. Mittit igitur ad PETRUM dolosus, reconciliatum animum suum, voluntatemq; Optimam erga Eum simulat, constare sibi Innocentiam Viri, pænitereq; se omnium quæ contra innocuum gesserat; Castra omnia in Hungaria adempta restituere pollicetur, modo Dominum mutare consentiat, à CASIMIRO ad *Mathiam* transeundo. Addidit multa ad commovendum animū profutura, Virtutem nimirum, totque præclara facta apud CASIMIRUM nulla præmia consecutam, apud se in pretio summisque muneribus futuram. Sed dum apud PETRUM technarum *Mathia* non rudem, nihil effecit, fraudem, quam in alterutram partem versaverat, promover: Rumores spargit, famamq; apud CASIMIRUM evulgat mendacem; PETRUM *Komorovium* cum *Mathia* arcana Colloquia, tractatusq; habere secretos, jam de Comitatu *Zyvecensi*, tacitis conditionibus pacisci. Habetur prompta rumoribus fides, & ut est suspicax Aulæ ingenium, pronaque in deterius Credulitas, mittitur cum Copiis mandatisque Regijs *Dembinius* tunc Cracoviensis Præfectus, Palatinus Sandomiriensis, qui Nomine Regio PETRO denuntiet, sibi pro Comitatu *Zyvecensi*, arcibusq; *Bervald & Szaffarij* vel pecuniam à Rege numeratam accipiendam, vel si abnueret, armatam vim ex-

perturum. Sensit KOMOROVIVS unde & quâ teterri-
mâ de nube fulmen istud in se contortum erupit; ast
Dembinius pro Innocentia obluctantem, Armatorum
Copijs aggressus, Oppugnationem Arcium demandat, fer-
ro & flammâ per dies quinquaginta cuncta populatur,
omniaque Vi Superiore corrumpit, ac devastat. Hæc
stipendia intemeratæ fidei, fortiterque in Hungaria na-
vatæ operæ tulit tunc PETRUS *Komorovius*;
exemplum de se præbiturus cunctis in Aulæ Culmine
positis, quam lubrico stent gradu, unde ut excidant,
non opus est noxâ, sed mali suspicione. At enim per-
spectum habebat PETRUS sublimè CASIMIRI Re-
gis iudicium, cuius æquitatis lux splendidissima, obnu-
bulari finistris rumoribus potuit, non extingvi. Itaque
innocentiæ præsidio Stripatus, eâque fiduciâ, quam re-
ctegestorum Conscientia inspirat tutus, Regem in Prus-
siâ tunc agentem convenit, exponitque, quam
iniquum sit ab eo injuriam pati, à quô jura expectantur.
Habet hoc innocentiae fulgor per se resplendens, quod
ultrò puris Oculis sese ingerit, neque longâ inspectione,
opus est, ut deprehendatur: erat & CASIMIRO Ju-
dicij acies perspicaciâ fermè cælesti, cuius claritate fa-
cile imposturam à vero discrevit, confusâque ac damnatâ
Matthia vafritie, innocuum *Komorovium* gradui, statuiq;
restituit, imò & gratiæ; non modò per errorem adempta
reddens, quin etiam recentia meritis apud se malè tra-
ductis, præmia decernens, cui præter ditiones restitutas,
damnaque compensata, amplissimam adjicit *Crasnosta-
viensem Præfecturam*. Ita Innocentia opprimi à malevo-
lis, at non supprimi valet. Quamvis crediderim verita-
tem tunc de Cælo, justitiamq; prospexisse, ac *Divum*
Casimirum Principem jam cælo receptum, PETRI KO-
MOROVII sui causam egisse, Patrociniumq; Ejus apud
Regem Parentem suscepisse: ut tot fida obsequia, Illu-
striaque merita, in petendo Regno Hungariæ proximè
in se

in se collata, ab injuriâ & cōtumeliâ vindicarentur. Habet proinde habebitque Jlluſtriſſima KOMOROVIORUM Domus Tutelare Proſapiæ Suæ Patrocinium *Divi Principis Poloniae* CASIMIRI JAGELLONIDIS, meritis fidelibus, variâque fortis vice, adhuc dum inter mortales Hic Divus ageret, nec non in obſequium gloriæ ſuæ, non tam diſcrimine, quam diſpendio magnæ fortunæ comparatum. Et quemadmodum in Hungariâ ab avito inter cæteras Arces Caſtro ſuo *Sannicolano* Divum NICOLAUM Indigetem habuit, ita in Polonia *Divi* CASIMIRI obtinet Numen ſibi propitium; *Retinetq;* (ut agebat Okoſcius) *uſque in præſentem diem pro ſinceris actibus Benedictionem Domini* Horum KOMOROWSCIORUM Domus. Quàm clara deinde pro Fide & Regno ſpecimina eodem *Casimiro IV.* Regnante exhibuit PETRUS, jam in illis memorandis contra *Crucigeros* expeditionibus ad *Choynicam* & *Grunvaldam*, ubi propriis Stipendiariorum ſignis rem geſſit, jam ad *Bukoveciam* Arcem, totoque *Oſwecimenſi* tractu, quem à prædonum colluvie ſub *Oſtrava* Præfecto ſuo graſſantium purgavit, Regnoque ac ſceptris CASIMIRI tranquillum adjunxit, Annalium perennis celebrat memoria. Frater PETRI erat Capitaneus Lancienſis NICOLAUS, Cujus ex *Oſaroviâ* Armorum *Rawicz*, Filix duæ: *Catharina Koryciſcio* Palatino Lancienſi, *Barbara Mathie Koſtka* Nuptiali fædere junctæ, clariffimas Domos *Komoroviorum* Genti nexu Sangvinis ſtrictius obligarunt. LAURENTIUS ejusdem NICOLAI Capitanei Lancienſis Filius, in *Podolia* Caſtrum *Struſſow* poſſedit, unde *Struſſij Komorowij* dicti, Propaginis *Komoroviorum* *Struſſorum* in *Podolia* Caput extitit. Ex His *Felix* & *Georgius* dimicando contra *Bogdanum* Moldaviæ Principem *Pocutiam* tunc occupantem, ALEXANDRO Rege: non inulti cecidère, ut ſcribit *Cromerus*. Horum enim fato, alterâ die Victoria ſtetit, nam ſan-

E gvinem

gvinem STRUSSORUM ulciscantibus Polonis, acri
 prælio commisso, Dux Barbarorum *Burcolabius* occu-
 buit, *Kopacz* vero exercitûs Præfectus Moldavici fugâ
 salutem quæsit, *Bogdanus* denique supplices literas
 ad Regem ALEXANDRUM misit, libellum concordiae
 postulando. *Stanislaus Struss* KOMOROWSKI, à
 Tartaris in Rastavicensibus Campis oppressus, duos Fi-
 lios reliquit ex *Wilczkowna*: Jacobum, & Georgium.
 JACOBUS *Struss Komorowski* Capitaneus Chmielni-
 censis maximus & felix Bellator, ex *Potocka* suscepit
Nicolaum, Cujus famæ elogium perpetuò monumento,
 recensetur in Epitaphio Ecclesiae Cameneci Podoliae de
 tali tenore: *Accede hûc Christiane Lector, & quem re-*
ferat hac Tabula vultum intueri, Talis erat ex vetustissi-
mâ Prosapiâ Illustrissimus NICOLAUS KOMOROW-
 SKI *Struss. Qui postquam varios ubique Terrarum*
Hostes Livones, Hunnos, Valachos, Gethas Moldavos,
Ottomannos; Ad Boristenem, Istrum, Pruth, Danu-
bium Fluvios tenuisset semper, diversis hostibus ex amore
Patriæ pro incatenato Obside devenisset, tandem in Pa-
triam redux, pro tot præclare factis, à Serenissimo SI-
 GISMUNDO III. *Haliciensis, Sniatynensis, Kołomy-*
ensis, Chmielnicensis, Lubaczoviensis Capitaneus, nec non
Senatoriâ dignitate cumulatus, cum plus suis viribus terra
non sufficeret, ad cœlestia cum summo Ecclesia, Patriæ,
Senatûs, militum merore Anno 1627. die 7. Januarii,
ætatis 50. accersitus, abiit. Reliquit duas Filias, Unam
Sieninscio, alteram *Adamo Kalinowski* Braclaviensi, Vin-
 nicensi, Lubaczoviensi, Łojowienfi Capitaneo primùm,
 deinde Illustrissimo Duci in Visniowiec Russiæ Palatino
 Nuptam. Ita *Korczak* Vestri Avita Flumina, tanquam
 Fluvius Paradisi in diversa Familiarum Capita exun-
 dante dividuntur alveo. Jam ad Primævam directam-
 que Vestram revertor procedentiam.

Anno 1480. Defuncto Parenti PETRO Comiti in
 Zywiec

Zywiec Capitaneo Crasnostaviensi, gemina successerunt Sydera *Alexander* & *Christophorus*, quorum alter *Hesperium* exhibuit fatum, nempe *Alexander Pocillator Cracoviensis* præmaturo extinctus Occasu.

CHRISTOPHORUS alter *Petri* Filius Castellanus Sandecensis Comes in *Zywiec* Phosphorum se exhibuit, quippe Generis Sui diem, Lucemque reddidit Splendore Familiæ in successoribus propagato, nam præter Filiam *Catharinam* quæ *Sbigneo Lanckoronski Succamerario Sand:* nupsit;

Anno 1526. PETRUS *Christophori* Filius Comes in *Zywiec* Castellanus Połanecensis memoratur, qui cum *Barbara* Comitissa de *Tarnow* celebratis Sponsalibus prolem suscepit *Sophiam*, *Nicolao Myskowski Oswiecimensi* Castellano Nuptam, Idemque Filios tres numeravit, videlicet *Joannem Pocillatorem* Regni & *Adalbertum*, de quo Constitutione Regni 1567. habetur mentio, hi duo posteritate caruerunt. Tertius Castellani Połanecensis Filius

CHRISTOPHORUS Castellanus Oswiecimensis Comes in *Zywiec*. Celebrat præcipuam Ejus erga Patriam Charitatem sub Interregni tempore Constitutio Anni 1586, in cuius tutelam aliquot signa stipendiis suis tenuit. Decem millia æris proprii in Bellum contra Turcas Republicæ Liberalissimè numeravit, ut habet Constitutio Regni 1593. Huic primo fædere juncta *Lutomirska* Castellanis *Zavichosten* protulit Filium *Joannem*, nec non Filias, *Sophiam Bużenscio* Capitaneo *Dobczycensi* nuptam, *Barbaram Feliciannam*, & *Annam*, innubas. Secundo verò voto *Barbaram Płazianka*, sibi conjunxit Capitaneidem *Lubaczoviensem*, ex qua Octo Filios recenset Domus Genealogia, videlicet *Andre-*
am, *Josephum*, *Joannem* duosque *Stanislawi* Nomine, qui immaturo decesserunt fato. *Petrus* Ordine Sextus Capitaneus Oświecimensis cum *Catharina Przerebska* prole

caruit, Arcem Oświecimensis Præfecturæ, Tritavi Sui *Petri* Virtute bellicâ Regno adjunctam, ut Domûs Sux beneficium ac meritum in Patriam perrenne redderet, sumptu notabili reparavit. *Alexander* Ordine Septimus, ex *Dembinska* Castellanide Biecenfi Filiam nonnisi suscepit *Catharinam*, quæ primùm *Petro Grudzinſcio* Capitaneo Sredenſi, deinde *Theodoro Łaski* Mareſchalco Curix M. D. L. nupſit.

NICOLAUS numero Octavus Castellani Oſwiecimensis Filius, Capiraneus Oſwiecimensis erat, in quem tot poſt ſterilia Fratrum Funera, Domûs Spes inclinata recubuit; Famam illius inde extollit *Hiſtoria Cichocio* teſte, quod Eccleſias redditibus auxit, Sacrâ ſupelleſtili Splendoribusque decorem Domûs DEI promovit, Sacerdotiis fundatis, cultum Divinum propagavit. Vir magni Animi & præcellentis *Annæ de Mirow* Marchioniſſam *Myſkowska Sigismundi* Supremi Mareſchalci Regni Filiam duxit, ex qua Quinque Filios ſuſcepit. *Stephanum* qui Eccleſiam Parochialem in *Sońsk* fundavit, Genus Komorovium, in Ruſſiam, Podoliam, Lithvaniam invexit. *Andream* Præfectum Copiarum Exercitûs Regni *Kazanovio* & *Potoccio* Ducibus: Triginta Annorum emerita militia clarum. *Petrum* Regio & Reipublicæ Nomine Comiſſarium Gentis Coſaticæ *Sigismundo* III. & *Vladislao* IV. Regibus, *Chriſtophorum* qui ex *Marcianna Przylecka* unicam ſuſcepit Filiam, *Constantiam Chriſtinam Joanni Wielopolſcio* Supremo Regni Cancellario elocatam, quæ in Illuſtriſſimam *Wielopolſcium* Domum, Jura Succeſſionis ad Marchionatum *Pinczoviensem* intulit. Idemque ſecundo voto habuit *Lanckoroniam Nicolai Succamerarii* Podoliæ Filiam. *Nicolaus* præfatus Oſwiecimensis Capitaneus, in Anno 1624 Comitatum *Zyvecensem*, à ducentis ſupra Annis in Domo Sua Hæreditarium, *Constantia* Reginæ *Sigismundi* III. ſecundo nuptæ conſtituto pretio ceſſit; & *Capitaneatum Neoforenſem* accepit.

JOAN-

JOANNES Ordine quintus *Nicolai* Filius Dapifer Beſ-
 zensis, Judex terreſtris Cracoviensis; clarebit Legationum
 ejus memoria, per Legum Patriarum tabulas perennes,
 Annorum 1618. 1620. 1623. 1631. 1637. 1638. Huic *Dorothea*
Lipſka Andreæ Episcopi Cracoviensis soror protulit *Ada-*
mum Canonicum Cracoviensem, Abbatem Wachocen-
 sem Regentem Cancellariæ Regni. Cui in Divisione
 sortium substantiæ, Bona *Witow* & *Dabrowa* in Palati-
 natu Cracoviensi, Districtu Proszoviensi cesserunt. De
 Eo aliud sibi Ecclesia, Familia, & Patria proposuit,
 aliud disposuit fatum: quippe multorum complicatione
 morborum, ut habet ejus Epitaphium in Cathedrali
 Cracoviensi Ecclesia, primò ætatis flore immaturo de-
 cessit ævo, acerbo Avunculi Principis Episcopi Cra-
 coviensis dolore.

STEPHANUS alter filius JOANNIS ex *Li-*
pſcia frater immediate memorati *Adami* Canonici Cra-
 coviensis, Hæres in *Suſno*, *Nieſtanice*, *Ghyſowice* *Łuſczow*,
Lemieſow & Sortium *Trzeſzczany*, Cohortis Regiæ Tri-
 bunus, Succamerarius Beſzensis, *Catharinam* *Myſkoviam*
 Castellanidem Beſzensensem, Capitaneidem Tyszovecen-
 sem duxerat, ex qua præter *Michæelem*, qui sine poste-
 ritate decessit, Duos Filios suscepit, Capita Nobilissi-
 marum duarum *Komoroviana* Gentis in Russia propa-
 ginum: scilicet *Joannem* & *Adamum*.

JOANNES Primogenitus Stephani, ex *Myszkow-*
ſka Castellanide Caput Primæ propaginis, cum *Ko-*
MOROWIA Armorum Olor, procreavit *MICHAE-*
LEM Venatorem Buſcensem Hæredem in *Suſno* & *Nie-*
ſtanice. Virum Illustrem, qui tyrocinia ætatis exegit in
 Armis, & insignia fortitudinis specimina in Castris ex-
 hibuit; deinde ex *Barbara* *Łopacka* Subdapiferide Cie-
 chanoviensi suscepit *JACOBUM*, Spem generis Sui
 Columnque futurum, nec non tres Filias; *SOPHI-*
AM Sacri *CANONISSARUM* *Varſaviæ* in *Mariæ-Villâ*

Parthenonis ABBATISSAM Consecratam. TERESSIAM Francisci *Bekierski*, Capitanei Ostroviensis ad præsens Viduam, quæ Seraphicæ Tereffiæ pietatem & Sapientiam, cum Vidualis Statûs Officiis custodit, meritòque illum honorem quo verè Viduas honorare præcipitur, sibi vendicat, hujus enim Status Elogia ita in se exhibet, ut ex ipsa morum Illius Imagine integerri-
mâ accuratiùs efformanda forent, si nusquam haberentur descripta. Crescit sub Oculis tantæ Matris, tenella, sed ad Maternæ probitatis formam composita unica ex Bekierscio Filia CONSTANTIA Capitaneis Ostroviensis, quæ Amitalibus *Sophia* ANTISTITÆ, Maternisque *Tereffiæ* exemplis non minores quàm *Eustochium* sub Oculis *Paula* sumit profectus. Decus & Ornamentum ævi Sui futura, Cui concesserit in Vota, felicem Coronam allatura. Ternionem Gratiarum Soror tertia complet *Michæelis* Venatoris Buscensis Filia CONSTANTIA, Hic secundarum Nuptiarum Nexu *He-
lenam Rostkowska* Pincernidem Płocensem sibi sociavit, ex qua *Nicolaum* & tres minorennis numerat Filias. *Michaelis* Patruï Sui præmatura ac Sterilia fata benedictione prolis compensando.

Alter *Stephani* Succamerarii Beżzensis cum *Myskovia* Castellanide Filius jam prodit in paginam, ADAMUS Venator Buscensis AVUS TUUS memorandus, Caput Ille secundæ propaginis ad TE proximius deducendæ; Huic ex *Catharina Jarocka* Armorum *Razwicz* Ensiferide Præmisliensi, Sebastiani Branicki Armorum *Korczak* Episcopi Posnaniensis Nepte, ex *Poniatowskia* Sorore germanâ PONIATOVIIJ Parentis hodierni Palatini Mazoviæ prognatâ, Primus Filius STEPHANUS, Cui ex *Hedvige Młocka* dux duntaxat Filix fuerunt *Susanna Makowieccio*, deinde *Gurowscio*, & *Constantia Casimiro Grabianka* Tribuno Livenfi Nuptæ.

JOANNES Dapifer Novogrodensis Suo jam Celebre-

lebretrur Encômio secundo genitus *Adami*, Parens TUUS
 desideratissimus. Hic quidquid ab Avis Aravisque glo-
 riæ manavit, in se Complexus est, ut in T E transfunde-
 ret : ætate quippe primâ per Virtutum spatia magnis
 meritorum passibus exactâ, Atria Domûs Clarissimæ ita
 Majorum Imaginibus exornavit, ut singulorum Probi-
 tatis Laudisque genuinam effigiem actibus exprimeret,
 Memorix Omnium Aram honoris in se recte gestorum
 Celebritate Sacram dicatamque ponendo: Cui TU *Pon-*
tificia PRIMATIALIQUE *Majestate* fastigium gloriæ
 imponeres. JOANNIS Paternum Nomen, Omen gra-
 tiæ TUÆ fuit, TE vero ADAMUM non sine fatidi-
 co oraculo vocari jussit, quod Primam Principemque in
 Regno Dignitatem TUAM ipso Nominis vaticinio
 præfagiret. Spectat Ille nunc de Cælo cum *Illustrissima*
 de SULMIRSCIIS *Constantia* Lectissimâ Conforte
 hæc sua Solatia, quorum præfagium, sibi, alijsque jam
 in teneriori ætate cuncta TUA compositio præferebat
 certissimum. Enim vero perlustranti mihi hætenus
Domûs Vestra Fastos, cogitatio incidit, plus ne gloriæ?
 ac Splendoris ex KOMOROVIS in alias clarissimas
 Familias profluxerit, quam Ipsi ab alijs derivarunt?
 Quæstionem hanc in utramque partem animo volventi
 obversabantur KOMOROVIAE *Heroides*, quæ *Ten-*
czynijs, *Oleśnicijs*, *Konieczpolscijs*, *Korycinskijs*, *Kalinow-*
scijs, *Wisniowieccijs*, *Lanckoronscijs*, *Wielopolscijs*, *Kost-*
kijs, *Łascijs*, *Młoccijs*, *Bużenscijs*, *Hulevicijs*, *OranScijs*,
Złotniccijs, *Bekierscijs*, *Makowieccijs*, *Złoccijs*, *Grabiankijs*
 Nuptialibus junctæ fæderibus, ad immortalem tot No-
 minum clarissimorum fortunam, attulerunt quandam
 propagatione gloriæ perennitatem; Occurrebant menti
 ex adverso *Potoccia*, *Tarnovia*, *Lanckoronia*, *Myśkowia*,
 toties ultro citroque repetitis nexibus *Zipschia*, *Lutomir-*
scia, *Plazia*, *Dembinia*, *Przylęccia*, *Przerębscia*, *Oza-*
rovia, *Łopaccia*, *Rostkovia*, *Cichoccia*, *Jaroccia Sul-*

mirscia, Radeccia, Slugoccia, Kumaniectia, quæ Splendoribus Vestris Suos junxere fulgores, lucemque luci addiderunt, ut anceps mihi videretur decisio, à qua parte, cui plùs accesserit? KOMOROVIORUM enim *Flumina*, in Omnes Vetustissimarum Domorum influxerunt Parentelas, & vicissim quasi quoddam sanguinis alti Pelagus in Vestra Flumina intravit. Vos in Omnium, Omnes in Vestram gloriam contribuerunt. Ita hærenti animo opportunè occurrit CONSTANTIA de *Sulmirscijs Diva Parens*. T U A ita rem definiens, quod nimirum tot longa decorum Ornamentorumq; serie sæculis retroactis, in T U A M P R I N C E P S gloriam laboratum est, deinceps verò à T E uno tam Conjunctarum Prosapia- rum, quàm propriæ Illustrissimæ Geneseos summam maximamque Claritatis augem præ cunctis derivandam. Profecto quidquid præclare gesserunt Majores T U I, meritum id omne T U U M est, & ipsæ quibus Illi extolluntur laudes, T U Æ sunt etiam, cum sint Virtutis. Quotiescunque enim Animi magnitudo, qui Universis Unus par sit, quoties mediis in malis rigescentis Constantiæ robur, aut Prudentiæ futurorum Dominæ acumen in aliquo eorum celebratur, toties T U in alio laudaris. Scilicet parum Illis visum est maxima perficere ac laudatissima, nisi etiam Animo T U O agerent: in quo velut in effigie Virtutis, Animæque Sux gloriæ superstites se esse, ac redivivos gaudent. Quibuscunque enim, laudibus ornata fuit Virtus Majorum, eas omnes gloria T U A sibi vendicat, tanquam in T E refusas ac redundantes, sibiq; olim acquisitas ad se trahens, ac revocans, ullâ sine diminutione possidet: ut in perpetuis Domûs T U Æ *Fastis* nulla alia cernas, nisi ea, quibus contextus est totus ætatis T U Æ decursus, summæ virtutis specimina. In hanc gloriam T U A M P R I N C E P S, Recte gestorum Suorum decora infinita propemodum contulit PETRUS SULMIRSKI *Vexillifer* Braclaviensis; quanta

quanta laudum præconia TIBI hic Avunculus excitat
 Hector, qui ætatem Marti consecratam, Inviictissimo illi
 Heroum Numini JOANNI III. obtulit, eo sæculo, quo
 Polonia fortissimorum Virorum gloriâ & numero efflo-
 ruit. *Astræam* sociavit *Bellona*, dissidentes invicem raroq;
 concordēs Deas, pulcherrimis nectendo fæderibus, *Judex*
Generalis Castrensis, munere hoc usque ad ultimam Vitæ
 periodum sanctissimè administrato. Vir in Toga per
 Tribunalia diversasque publicas Legationes Sapiens,
 Justus, Incorruptus, in sago fortitudine clarus, Amo-
 rem & venerationem Omnium singularem cultissimo
 Ingenio, & moribus sibi devinxit. Illud etiam imple-
 vit, ut pro Justitia agonisaret, Functioni summæ in Tri-
 bunalis Regni subsellio, præclaro memorandoque im-
 mortuus fato, vincitque fata superstite famâ: Virtute
 quippe ornatissimum ævum Cœlo, memoriam merito-
 rum perennem Patriæ commendavit. Samuel *Sul-*
mirski Avunculus alter *Venator Bractaviensis*, perfectæ
 virtutis typum, omnisque honestatis exemplum in se
 expressit, cum plurima Ornamentorum in Patriam,
 commodorumq; in Familiam accessione. Sed nemo
 Majorum in TUAM perpetuam famam contribuit accu-
 ratiùs, quàm *Illustrissimus* & *Excellentissimus* JOSEPHUS
Myßkowski AVUS TUUS *Catharina Myßkovia* Castel-
 lanidis Belzensis Frater, Ipse *Sandomiriensis Castellanus*
 Sublimi Senatoriâ Curuli clarus. In Consiliis & Judi-
 ciis Vir animo præcellenti magnus, Authoritatis ple-
 nus. Amicos beneficiis obstringere, Hostes Magnanimi-
 tate capere in usu habuit. Quidquid meritorum & glo-
 riæ MYSZKOVIORUM Nomine hætenus pro-
 pagatum fuerat, in se conclusit, ultimus hujus Gentis
 per Masculam stirpem Marchionum. Antiquam Majo-
 rum Suorum de Republica bene merendi consuetu-
 dinem amplexus, Celsissimam *Magdalenam* Ducissam
 CZARTORYSKA in Fædera vitæ, assumpsit.

Cum JORDANORUM vetustissimâ Prosapiâ Affinitates per Neptem ANASTASIAM Myszkowska *Jordano* Palatino Bracławiensî Nuptam celebravit, & ut tot recte gestis fastigium meritorum in Patriam superadderet, Majorumq; gloriam posteritate sibi negatâ propagaret in factis, in TE PRINCEPS Nepote Suo tantæ laudis perennitatem spiraturam, duraturamque sentiens, præcellentem Indolem TUAM curâ, educationeque adornare constituit, quò Talem Tantumq; PRIMATEM Patriæ toti efformaret. Hæc sunt PRINCEPS, quæ TE longo sæculorum tractu præcesserunt ad hunc Majestatis apicem, quem hodie conscendis. Quæ verò comitantur in hoc rerum fastigio constitutum, jam veniunt recensenda.

Et imprimis comitatur Sacratissimam Consecrationis TUÆ Pompam pretiosa Fratrum Corona. Agit Antesignanum tanti Comitatus STEPHANUS MAMMERTUS *Dapifer Belzensis* Armamentarii Regni Colonelus, Heroica Annorum triginta stipendia, & sub casside emeritos Canos, in TUÆ Celebritatis decus præseferens. Exterorum Provincias amore sibi & veneratione devinxit. Senis excoluit Ingenium, quod ad omnis literaturæ cultum ætas cum optimarum Artium notitia, nec non per Italiam, Galliam, Germaniam, longis terrarum spatiis continuata peregrinatio præformavit. Patrio redditus Solo, totum se publicis addixit Usibus. Toties ad Tribunalia Commissarius, ad Comitia Regni Nuntius, in Comitibus Pacificationis ex Palatinatu Belzensi *Angelus Pacis*, fortitudini militarique animo consilium adjunxit. Ex *Marianna* RADECKA Castellanide Lubaczowiensî duos in spem Patriæ & Familiæ suscepit Filios JOANNEM *de Dukla* VEXILLIFERUM *Ballistarum*, & JACOBUM *Antonium* in Regimine Principis Regii Honorarium COMMILITONEM: qui ad præsens Studia plena laudis pertractant, amplexuri deinde ea, unde gloria Domûs succrescat. Ad Imaginem & exemplum
PATRIS

PATRIS, ad obsequia Reipublicæ & Regum optimè instructi, nunc literarum Observantissimi, post Amatores Castrorum futuri, servant modestiam Juvenes, spondent Consilium senes. Totidem numerat Filias BARBARAM & ANNAM pulcherrimarum dotum compendia in se complexas. Dignus Ipse qui pridem sublimiores in Regno ornaret curules; sed venient Sua fera licet virtutibus præmia, nec finet Optimus meritum Cognitor & Ponderator AUGUSTUS, ut posterì non sine querela referre valeant, STEPHANUM MAMMERTUM sub ingrata remunerationis sterilitate ævum duxisse. Nihil enim PRINCIPI Nostro adeo carum est, quam Optimus Civis Patriæ, idemque Sapiens Consultor & Ductor.

Accedit JOSEPHUS *Dapifer Horodlensis*, Cui primò *Cichoccia* Judicides Grabovecensis IGNATIUM & filiolam immaturo sublato fato protulit. Altero vero nexu *Joanna Slugocia* Pincernæ Chelmenfis Filia conjuncta est. Is Legationibus ad Comitìa Regni Grodnenfis & Varlaviensis *Consos* refert veteresque *Calones*.

Proximè Hunc assistit MARCUS CYPRIANUS, in quo magnâ cum gravitate conjuncta modestiâ certat. Sacrum meritum stadium in Ordine *Scholarum Piarum* emetiri constituit, jamque glorioso Annorum supra triginta consummat cursu, post Ecclesiasticas Cathedras duodeno annorum Spatio *Rector*; Cui præmia colligit nunc *Pia Pallas*, Magistra Sanctioris Consilii, solidæque mentis.

PETRUS *Venator Bracłaviensis* cui præsentem hanc felicitatem præcepit invidit fatum, in loco sui ex ANNA *Kumaniecka* Capitaneide Pilznensi Filios Superstites, MICHAELEM nempe & STEPHANUM Filiamq; CONSTANTIAM Solium TUUM Pontificium cingere jubet. Hic actu vitam recte gestisque magis, quam tempore emensus, illud in se, quod fama celebrat,

adimplevit Elogium: *In Patriâ Virtuti sat est obijſſe: ſibi-
que perſimiles Patriæ progenerâſſe Sux.* Michael vero &
Stephanus deſideratiſſimi Pignora cara Patris, Juventu-
tem Suam ad præſtantia facta natam, cum muſis occu-
pant, donec ad obſequia Patriæ robur ætatis aſſumant,
Majorumque gloriam propriis illuſtrent factis.

SAMUEL in Sacro *Eliz Carmelo* congrua Statui Reipu-
blicæ promptè exhibet obſequia, ore collaudans Eum-
qui Spirituum & rerum omnium obtinet poteſtatem,
Virtutumque omnium Ornamentis conſpicuus, cunctis;
ex Aſceterio illud ingeminat, quod Sacer Poëta canit.

*Eſt magnum, Magnos Titulos numerare Parentum,
Et Genus è veris ducere Nobilibus.*

*Eſt Majus, vitam morum ſplendoribus Auſtam,
Virtutumq; Sacra ferre ſub Aſtra face.*

ILLuſtrat meritorum Suorum clariffimis titulis hunc *Di-
em Honoris TUI, IGNATIUS Enſifer* Terræ Cheſ-
menſis, geminaq; ſecum in augem Lucis accendit Splen-
dencia Sydera JOSEPHUM & CASIMIRUM ex
CATHARINA RADECCIA Caſtellanide Lubaczo-
vienſi procreata. Hi Parentis ſui per Comitia & Tri-
bunalia Regni vocalis famæ præconio celebrata æmu-
laturi munera, ad præſens Apollini Indolem pulcher-
rimam devovent, quorum *Angela* Soror omnem for-
mam probitatis in ſe, effigiemque repræſentat.

Stetit juxta hanc Aram Celebritatis TUÆ MI-
CHAEL *Venator Lubaczowienſis*, cui etiam ANGELA
ZLOCKA Theſaurarii Nurenſis, Conſors Lectiſſima,
thymiamata plurimarum virtutum Suarum devotiſſimè
adolet in Majorem Solemnitatem. Omnes vero præfati
inſimul proximo nexu ſibi ſociata, TIBIQUE Czartorij-
ſciorum per Myſkovios ac Jordanorum, Wielopolſciorum
per Vos ipſos Komorovios: ac Potocciorum, per Seruſſos
gentis Veſtræ. Poniatowſciorum per Jaroccios, Rzevu-
ſciorum, Humiecciorum per Radeccios, Cichocciorum, Stu-
goccio-

gocciorum, Kumaniecciorum, Zlocciorum, Soltykoviurum
per *Obodynscios, Suisciorum*, per *Sulmirscios, Ozgas* &
Gluziccios. Præstantissima, Pervetusta, & meritorum
gloriâ Patrio externoque Orbi celebratissima Nomina,
ducunt in Consortium lætitiæ. Quorum laus durabit in
luce temporum, famâq; rerum, quamdiù fides Annalium
stabit, curaque mortalium erit Augustiora cognoscere.

Sed inter tot confertissima decora, quæ TE circum-
stant undique, TU PRINCEPS Ipse maximum TI-
BI decus es, rarissimis ijsque singularibus ac propriis
Animi Præstantissimæque Personæ Tuæ ornamentis;
quippe non solâ Majorum opinione & gloriâ uti, sed
propriis etiam florere gestis ac inclarescere elegisti.
Ante igitur Sapientia, Magnanimitas, Justitia Pietasq;
TUA ut propriæ nativæque dotes mihi laudandæ ve-
niunt, nisi forte supra omnem laudem gloriamque sit,
quod hæc eadem decora, per exteras Gentes vario-
que Populorum mores, illibata, intactaque servaveris,
& rarissimam magnis Domibus in Exteris laudem, cu-
stodiveris Innocentiam.

Non enim inter Sacros Thebarum Eremitæ recessus,
aut consecrata abstinentiæ Claustra, sed *Romæ* spatium
ævi florentis emensus in illo mundi publico Theatro, in
illo Sacrario Fidei, ac Religionis veluti Arce, summâ
graviora studia morum Sapientiâ consecrasti, atque ad
occupandum, quod hodie obtines PRIMATIALE
Solum, *Rex Sacrorum* jam tunc parabaris. Comita-
bantur ubique futuri PRINCIPIS Vultum pudor, &
gravitas, nescio quam futuram Majestatem prælagiens
Ingens Animus, & animatum quoddam in tota specie
prisca virtutis simulacrum. Nihil affectatum in gestu,
sed nativa probitatis lineamenta ad vivum exhibentes
mores, absq; illo contorsionum multiplici studio, quo
plurimi dum virtutem per imitamenta falsissima effin-
gunt, non nisi torvam prorsusque sibi repugnantem ex-

H

hibent

hibent. *Lauream Doctorem* in Urbe tot Ingeniorum Matre atque altrice fecundissimâ publico plausu atque approbatione communi consecutus, præstantissimo Ingenio, ac moribus TUIS ita venerationem estimationemq; summam conciliaſti, ut simul omen non vanum rerum maximarum inde exportaveris, peracta apud exteros itinera syderis more, vestigio lucis ubique signando.

Sed jam inde revertentem reducemq; Augustissimo *Cathedralium Cracoviensium* gremio receptum, Patriæ redditum, Munerumque maximorum in usu constitutum festinans assequitur Oratio. *Illustrissimum Excellentissimum & Reverendissimum* CATHEDRALE CAPITULUM CRACOVIENSE, quod summos nonnisi fert *Proceres Sacrorum*, nec tam Prælatorum quàm Antistitum cætus est, Archi-Præfulum, Præfulumq; indeficiens scaturigo, & quoddam Ministerii, Senatûsque Sacri totâ Poloniâ Seminarium, quam primum TE in numero suo obtinuit cooptatum, apertos mores & excultos, animum supra corporis dignitatem, & decus formæ nihil humile aut vulgare spirantem, & quandam summæ Indolis insitam in Te Majestatem advertens; ut Decus suum & Ornamentum, ut Columnen & Præsidium olim futurum, jam tunc veneratione amoreq; præcipuo proſequabatur. TE in ore laus omnium, TE in corde perpetuò gessit amor & reverentia Collegarum. Occupabat eo tempore Vavelli Pontificiam Sedem non modo Cracoviensium, sed maximorum Antistitum Maximus CONSTANTINUS FELICIANUS SZANIAWSKI, nunquam sine reverentiâ nominandus, cujus memoriam & sacra cinerum *Ecclesia & Patria* reverebitur perenniter, tanquam veri Poloniæ statoris. Hic TUÆ velificaturus æstimatissimæ apud se Dignitati, *Cancellariatus Cathedralis* Prælaturam vetustate temporum intermissam, oblitteratamque per se recenter ab oblivione

oblivione & injuriâ temporum vindicatam, restitutamque postliminio in gratiam TUI reduxit, imo TU Ipse hortantibus & Suffragantibus Honori TUO *Szaniavii Principis* votis, Peraugusto Capitulo liberalitate TUA reddidisti.

Ita *Cathedralibus Vavelli Proceribus* novus Tecum accessit splendor Dignitatis, quod quàm late pateat tum in gloriam TUAM, tum utilitatem publicam, Majestatemque Sacrorum, nemo est, qui non capit. Quid ego ulterius TUAM Fidem, Humanitatem, Prudentiam, Constantiam, Justitiam, Zelum Religionis singularem, cœterarumq; virtutum præconia Oratione prosequar? quarum nec obscura, nec ignota specimina edidisti. Quid gestos cum Nominis celebritate, in *Ecclesiâ* per Officialatus, Principemque *Cracoviensem*, PRÆPOSITURAM *Cathedralem*, tum in *Patriâ* per repetitos toties Supremi Tribunalis Regni Magistratus, illos memorandos edisseram? quibus omnibus TE huic sacræ Purpuræ, quam hodie assumis, jam olim parem merita præstiterunt. Quodsi licuisset in arcana futurorû absq; Ministerio Syderum Animum immittere, jam tunc spes humanas ad ea tempora legissemus excitationis augurio, quorum eventum nos præsentis felicitate sentimus. Jamque Regna Regumque animos Prudentiâ complectens, ad Ministeria Regni, ad Insulas & Cathedras vocabaris, AUGUSTI Suffragio & altâ destinatione, sed declinabas. Conscientiam recte gestorum pro Cidari reputans, & Coronâ. Alios TIBI præire sivist, accipereque præmia TIBI parata, modestè recusasti. Donec maturâ meritorum luce non in parte Orbis, sed medio ipso Patrii Cæli in centro, pleno meridie Honoris subitò inclaresceres VICE-REGIA PRIMATIALI QVE Majestate. Ipsius SOLIS SERENISSIMI *Patris* Auctâ quippe per obsequium famâ, adeo TUAM Principi comprobasti fidem, ut ad Regiam accersitus,

quàm primùm locus oblatus est, in eò Metropolitanæ Sedis collocatus fueris *Solio*, ex quo Sanctissimi SZEMBEKII, vel Maximi OLESNICCIJ, KARNKOVII, MACIEJOVIJ, RADZIEJOVIJ, OLSZOVII, POTOCCIJ, decessêre; ut TUÆ dignitati & Gloriæ spatium locusque pateret, & redderetur suus splendor Honori, Honor Virtuti.

Ita est PRINCEPS, mutuam vicem reddis Dignitatibus, singulis enim quas gessisti, novum Tecum decus accessit. Vidimus hætenùs sacras Dignitates ad Optimum quemque defetri: Ast in TE PRIMATIALEM Honorem summo etiam gradu attolli conspiciamus; ac intercedente TUÆ pretio Virtutis, novis insuper Ornamentis augeri à PRINCIPE AUGUSTO gratulamur Universi. Conspiravit ad augenda decora TUA Orbis uterque, POLONIA ad Insignia Splendoremque Eminentissimi in Patria hac PRIMATIALIS gradûs distinctivam efflagitando Purpuram: ROMA continuò eandem TIBI amplissimis cum facultatibus decernendo, deferendoque. Et hujus quidem usum ab omni temporum ætatumq; memoriâ, tenuerunt Prædecessores TUI, ut non tam novum aliquid huic Prærogativæ attribui videatur, quàm Vetustissimus mos confirmari: Sed aliud prorsus est quod usu obtinetur, aliud quod VATICANO assertum Oraculo se se tuetur; quo vel contentio, vel ignorantia ac æmulatio multorum retundatur. Et quidem omnium Superioris ævi Maximorum PRIMATUM Prædecessorum TUORUM adoranda sunt Nomina; Eorum imprimis per quos Archi-Præfulex Sedi TUÆ *Metropolitico jure* toto Regno ac Magno Ducatu Lithvaniæ latissimè præeminenti, per diversos sæculorum tractus diversa facta fuit gloriæ, honoris ac utilitatis accessio. Colitur inter Divos ADALBERTI, BOGUMILI aliorumq; sanctitas, celebratur distincto
famæ

famæ elogiô **HENRICUS** *Kietlicz* Dux Brigēsis Anno 1200 Primas memorandus Ecclesiasticæ libertatis Assertor, de quo hæc refert *Długossius* clarissimus rerum Polonicarum Scriptor: *Henricus Archiepiscopus cum esset animi generosi, multos labores subiit, & sustinuit pro Ecclesiæ Polonæ libertate acquirenda, ac dilatanda. Ipse de consensu unanimi Ducum Polonia Universum Clerum Ecclesiastici fort, Privilegio fecit gaudere. Deinde cum pro hac Libertate tuenda Romam se personaliter contulisset, ibidem rebus omnibus pro voto apud Sedem Apostolicam obtentis, accepto LEGATIONIS OFFICIO, in Regnum Polonia rediit, cum magno honore à Ducibus Polonia receptus, Privilegium Libertatis Ecclesiasticæ qua LEGATUS NATUS publicavit, Cælibatu quoque Clerum Polonia universum obstrinxit.*

Clarebit æterna **FULCONIS** *Primatis* memoria, qui *Ducatum Loviciensem* adjunxit Sedi Anno 1240, Privilegio desuper **CONRADI** Ducis Mazoviæ intercedente. Vigebit in Annalibus **JACOBUS** *Primas*, ejusque Animi magnitudo, qui Coronæ Regalis decus à cæde Divi **STANISLAI** Regno ademptum post ducentos annos restituit, Coronato **PREMISLAO** Rege anno 1292. Stabit sæculis omnibus firma **JAROSLAI** *Primatis* sententia, Statuto Regni, **CASIMIRO** Magno Regnante inserta, quâ illud intestinum diffidium causa decimarum inter Status, Spiritualem & sæcularem Diœcesis Cracoviensis, Palatinatibûs quoque Sandomiriensi & Lublinensi exortum, annuente **CASIMIRO** Rege, velut sequester inter Majestatem & libertatem electus Arbiter, Decreto suo composuit ac definivit Anno 1353. Perennabunt **JOANNIS** *Primatis* opera in Arcibus, quas per Archi-Diœcesim *Lovicij, Opatovia, Calissij, Uniejovia, Kamionæ* à fundamentis
I
erexit

erexit. Legetur inter titulos perennes BODZETÆ
Primatis Religio Orthodoxa, Baptisato Magno Duce
 JAGELLONE domoque sua Ducali ac Gente totâ,
 in Magnum Ducatum Lithvaniæ introducta Anno 1387.
 Eminebit in perpetuum stabilitus Lege Concilii Con-
 stantiensis Annô 1416. Sedis Metropolitanæ Gnesnensis
 agente NICOLA O *Traba* assertus *Primatus*, cum subje-
 ctione omnium toto Regno Poloniæ, & Magno Ducatu
 Lithvaniæ Ecclesiarum, ut Archi-Episcopali jure præside-
 at universis: quo etiam Decreto jus Coronandi Reges &
 Reginas Poloniæ, soli Archi-Episcopo Gnesnensi velut
 totius Poloniæ PRIMATI attributum est, hâc ipsâ Præ-
 rogativâ in tabulas Patriarum Legum postea quoque
 relatâ. Subsistet in vigore usuque perpetuo tamdiu,
 donec Sua Actis œcumenicorum Conciliorum, Sancitis-
 que Maximorum Pontificum Authoritas & reverentia
 constabit, Bulla illa LEONIS *Papæ* X. Annô 1515.
 in pleno Lateranensi Concilio data *Legationis Natæ*
 pro PRIMATIBUS Regni Poloniæ confirmatoria,
 quam hic per extensum apponendam suavit digna pe-
 renni famæ præconiô Laus JOANNIS ŁASKI
Primatis.

Bulla Apostolicæ Legationis Natæ 1515.

*LEO Episcopus Servus Servorum Dei
 ad perpetuam rei memoriam.*

PRO Excellenti præeminentia Sedis Apostolicæ, in qua post
Beatum PETRUM Apostolorum Principem, quam-
 vis imparibus meritis, pari tamen Authoritate constitui
 sumus

sumus in agro irriguo militantes, Ecclesie novas Lega-
tiones plantare, & instituere Pontifici dignum arbitra-
mur, per novas plantationes, praesertim in Locis Christi
Fidelium, infideli vicinis, ac in parte Schismata sustinentibus,
non solum populorum devotio, sed etiam haec ipsa nova No-
minis & fidei Domini Nostri JESU Christi plantatio,
Schismatumque eradicatio, ut augeatur, commodiusque suc-
cedat, & animarum salus subsequatur, ac Provinciae &
Regna illustrentur. Idque Nos eo libentius agimus in locis
praedictis, in quibus tum ex variis inter mortales, occasio-
nibus, tamen imprimis interitus Schismatum, ratio necessi-
tatis plerumque subesse conspicitur, & ad hoc Catholico-
rum Regum vota tendere noscuntur, ut assistentia &
Auctoritate Legati novi, & alma Mater Ecclesia pro-
pagationis, plantationis novae, & genus humanum propo-
siti felicitatis aeternae praemium feliciter valeat adipisci.
Attendentes igitur, quod in toto Regno Poloniae ac Magno
Ducatu Litvaniae una Metropolitana Gnesnensis videli-
cet, Principalis Ecclesia existit, cui omnes aliae Ecclesiae
dicti Regni Metropolitico jure, ac etiam Metropolitana
Leopoliensis, in Terris Russiae ad Regnum ipsum perti-
nentibus, Primatiali jure sunt subjectae: Et quodsi Vene-
rabilis Frater Noster JOANNES de ŁASKO, modernus;
& pro tempore existens, Archiepiscopus Gnesnensis, Suae
Archiepiscopali Provinciae & Ecclesiae, sibi Metropolitico,
ac praedicto Primatiali jure subiectis, non solum Metropoli-
tico ac Primatiali, sed etiam Legationis jure praesesset, &
ratione Dignitatis eiusdem Primatialis, hujusmodi Le-
gationis Officium haberet: ex hoc profecto Salubriori &
diligentiori exercitio Metropoliticae Primatialisque Juris-
dictionis, & commoditati Ecclesiarum, quae sibi Metro-
politico & Primatiali jure subjiciuntur, ac illis nunc &
pro tempore praesidentium Praelatorum, nec non Cleri, &
Populi Civitatum, & Dioecesium earundem, quae in eorum

opportunitatibus ad eundem Archiepiscopum & Legatum, ratione eorum, quæ vigore hujusmodi Legationis exercere poterit, facilius & commodius recurrere possent, & ejusdem Ecclesiæ Gnesnensis, & præfati Regni, cujus Reges & Incolæ Apostolicæ Sedi devoti, & Fideles semper esse consueverunt, devotioni, ac venustati plurimum consuleretur. Considerantesque in Regno Angliæ olim, & in Germania Archiepiscopos aliquot, Legatos Natos, per Prædecessores nostros erectos fuisse; eorundemque Prædecessorum vestigiis inherentes, & ad magnam instantiam, quam super hoc fecit & facit, SIGISMUNDUS dicti Regni Poloniæ Rex Illustris, debitum respectum habendo ad DEI honorem ac fidei Catholicæ exaltationem, prædictum JOANNEM ŁASKO modernum ad Nos, & Sacrum Lateranense Concilium prædicto Regno Oratorem destinatum, & pro tempore existentem Archiepiscopum Gnesnensem Legatum Natum, cum omnibus honoribus & oneribus consuetis, ita quod de cætero Suae Archiepiscopali & prædictæ Leopoliensi Provinciis, & Ecclesiis sibi Metropolitanico, & Primatiali jure subjectis, Non solum Metropolitanico & Primatiali, sed etiam Legationis jure præsit. Et ratione dignitatis Suae Primatialis, & Legationis Officium in ipsis Provinciis habeat, Autoritate Apostolicâ & ex certa scientia Nostra facimus, & constituimus, & etiam ordinamus; sibi nihilominus concedentes, ut omnibus, & singulis, Privilegiis, libertatibus, præeminentiis, exemptionibus, immunitatibus, honoribus, & gratiis, uti, & gaudere; ac quæcunque omnia, & singula, facere, & exercere, ac mandare, ordinare, & exequi, quæ ad Legatos Natos, & hujusmodi Legationis Officium habentes, quomodolibet pertinent, & quæ alii Legati Nati, præsertim vero Legatus Cantuariensis: in Provinciis Suis de jure, Privilegio, consuetudine mandare, facere & exequi possint, liberè & licitè valeat. Mandamus per præsentis Universis & singulis Suffraganeis, Leopoli-

Leopolienſique Terrarum Ruſſiæ Archiepiſcopo & aliis in dictis Provinciis exiſtentibus, quatenus eidem Archiepiſcopo & Legato. Nato pro tempore exiſtenti, in hiſ quæ ſibi ratione Officii Legationis, ſicut præfertur, competunt, pareant, & intendant. Non obſtantibus Conſtitutionibus & Ordinationibus Apoſtolicis ac literis, & Privilegiis quibuscumque conceſſis; illorum tenores acſi de verbo ad verbum exprimerentur præſentibus pro expreſſis habentes, quibus quoad præmiſſa ſpecialiter & expreſſe derogamus, cæterisque contrariis quibuſcumqꝫ. Nulli ergo hominum liceat hanc paginam Noſtræ Creationis, Conſtitutionis, Ordinationis, conceſſionis, Mandati, & derogationis infringere, vel ei auſu temerario contraire. Si quis autem hoc attentare præſumpſerit, indignationem Omnipotentis DEI, ac Beatorum Apoſtolorum Ejus, PETRI & PAULI ſe noverit incurſurum. Datum Romæ apud S. Petrum. Annô Domini 1515. V. Idûs Julii, Pontificatûs Noſtri Annô 3tio.

His Maximis ſummiſque PRIMATIBUS annu-
merandus venis PRINCEPS. Videbatur adhuc
ad Inſignia ſplendoremque tam Conſpicuæ, Pri-
mæ, Principiſq; in Regno Dignitatis deeſſe veſtium exte-
rior Apparatus, & Eminentiffimis non niſi propria Coloris
diſtinctio; meminimus tempora, quibus acerrimo par-
tium Studio lite in Sanctuario excitatâ utrinque res di-
ſceptabatur; ſed controverſiam diremit perpetuam AU-
GUSTI III mens Sacratiffima, qui interceſſionem
Suam ad PETRI Sedem eo nomine ſpecialiter dire-
xit; accommodatiûs Laudi TUÆ ratus, ſi PRIM-
TIALIS Prærogativa etiam Coloris Inſignibus per
TE creſceret, quam ſimul ac acciperes, Novis Orna-
mentis ſublimares, & Septuageſimus ſecundus in Ord-

ne PRIMATUM Regni, Vaticani Senatûs Patrum. Septuaginta numerum Purpuræ honore TIBI, Successoribusque decreto exhiberes. Quantus es PRINCEPS; per quem etiam Primi Patriæ Principis crescit, attolliturq; fastigium! Majestatis dignatione, Romanæ Curix favore, meritorum TUORUM summô suffragiô. Quantum circa TE natura laboravit, & gratia, probavit Fortuna, TIBI Uni non cita, sed prodiga; Cujus PRIMATIALIS Purpura nunc suo Splendore major, Honoris augem TIBI perenniter succedentibus debet ætatibus.

Communis vitiorum labes sæculum nuncupatur. Experimur quotidie in commutandis hominum mentibus aulicas valere dignitates, TIBI PRINCEPS in summo rerum fastigio posito, idem tenor modestiæ, eadem in amicos fides, in supplices pietas. Aulam TUAM ut ædem Sanctitatis, ut Innocentiæ Sacrum, ut Majestatis Conclave intramus. Proregiam Majestatem meritis adeptus, recte gestorum gloriâ Principum Primus ac Eminentior factus, PRIMATIALI *Primique Principis* Solio privatiæ fortunæ Majestatem immisces, vota mortalium è vicino accipis, obversaris omnium oculis, omnium animis, in quibus ubique regnas, & coleris Clementiæ gradibus. Tanta Tibi in omnes mansuetudo, tanta Laus Indulgentiæ. Ad TE Comitatus TUA faciles præstat aditus, invitantia patent limina accessuris, obvia cuique occurrit humanitas ac impetrabilis Clementia, sed prærogativâ quâdam singulari egestas humaniùs excipitur. Aliud ex alio occurrit, nec ullam laudem TUAM claudere licet, quin in aliam incidamus. In ea venisti tempora, quando non unam alteramve familiam, sed omnes Colonorum & Agrestium turbas dispersas per agros toto Archiepiscopatu
non

non caritate, sed inopiâ annonæ levare Tua liberalitas debuerat.

Ea cæli inclementiâ, elementorum aërisque intemperies regnabat proximè, quæ cunctos labores hominum per rura pagosque, non vitiavit modo, sed penitus corripit. Immodicus ardor & Ignis quasi Cælo deplus fata torrendo decoxit universa. Quodsi alicubi quantacumque eorum portio ad culmum perducta videbatur, ultimam hanc mortalium spem, portentosæ magnitudinis grando ita cuncussit contrivitque, ut nec ad falcem perveniret. Et istis colluctari malis, satis perquam fuerat; sed calamitatem priorem protrusit alia peior subsequens, dum nescitur quâ cœli, pelagive plagâ advolans flagellum, campis omnibus, arvisque incubuit, videlicet Ægyptiacæ cladi par Locustarum lues. Tot catenatarum quasi conspiratione miseriarum, non inter brutas solummodo pecudes pestilens pergrassata mortalitas, sed et homines ultimum malorum invasit fames, frumentorumque inopia. Sensit protinus admotum sibi Custodiæ TUÆ beneficium Numen, Incolarum tot ærumnis fessorum penuria; quàm primùm enim TE adepti sunt, mox imperatis à TE, collatisque omnis generis juvaminibus, misera illa Turba subditorum ità Se recreatos senserunt, ut suam salutem, tanquam beneficium TUUM hilares recolant, TIBI gloriam, sibi felicitatem Suam Tecum exortam gratulentur, gaudeantq; quod TUA unius munificentia, Egenorum omnium, amplissimum sit Patrimonium. Sentiunt illi profectò palamque profitentur æumnas suas à cælo, æumnarum levamen à PRINCIPIS Sui Clementiâ proficisci; imo de calamitate temporum minùs jam solliciti, & in adversa alacres, eo animo ac voto se esse indicant; ut unam solamque adversitatem reputent, TE orbari. Omnia illis eripiat natura, præter TE. TE salvo.

salvo, omnia sibi salva & tuta arbitrabuntur. Quid
sibi de ulteriori T U O Principatu, tractu temporum,
polliceri, augurarique non debet Patria? Cujus ipsa
primordia tot commodis, Ornamentisque veneramur
insignita.

VIVE PRINCEPS! Cujus muni-
ficentiâ, publica egestas mollitur. **VIVE**
annos! ultra etiam vota Nostra felices ac
diuturnos, & postquàm genus huma-
num diu T E mortalem habuerit;
ut Majorem Imperio Terrarum
Cœlo restituat.





